

三  
國  
志  
注  
補

三國志注補卷四十八

吳志三嗣主第三

心自不安

何氏校改心不自安

大赦改元是歲於魏嘉平四年也閏月

何云改元下脫建興二字以後永安元年例之則閏月上脫建興元年或尚有他文未可知也晉書五行志建興元年九月桃李華又鼎錄曰孫亮建興元年於武昌鑄一鼎其文曰鎮山鼎小篆書三足

二年

刀劍錄孫亮以建興二年鑄一劍文曰流光小篆書袁宇記  
卷一百十二鳳栖山在鄂州武昌縣西北二百二十五里吳  
建興年中鳳皇降此山因名山有石鼓鳴則雨

十一月有大鳥五見於春申

史記春申君傳考烈王元年以黃歇爲相封春申君賜淮北  
地十二縣後歇請封於江東因城故吳虛以爲都邑一清案  
春申本以蘄春申息得名至徙江東城故吳虛則今蘇州也  
松江之黃浦一名春申浦蓋亦以歇得名

五鳳元年夏大水

晉書五行志夏大水亮卽位四年乃立權廟又終吳世不上  
祖宗之號不脩嚴父之禮昭穆之數有關亮及休皓又並廢

二郊不秩羣神此簡宗廟不祭祀之罰也又是時孫峻專政陰勝陽之應乎

十一月星茀於斗

此卽王肅所指蚩尤之旗也占驗在魏正元元年

注江表傳曰是歲交趾稗草化爲稻

晉書五行志是六月占曰昔二苗將亡五穀變種此草妖也其後亮廢

二月

晉書天文志二月戊午熒惑犯東井北轅西頭第一星

七月將軍孫儀張怡林恂等謀殺峻

何氏校改張作孫

陽羨離里山大石自立

宋書五行志引京房易傳曰庶士爲天子之祥也其說曰石立於山同姓平地異姓干寶以爲孫皓承廢故之家得位其應也或曰孫休見立之祥也

使衛尉馮朝城廣陵拜將軍吳穰爲廣陵太守

孫峻傳峻欲城廣陵朝臣知其不可城而畏之莫敢言惟滕允諫止不從而功竟不就一清案廣陵城在揚州府城東北秦置縣漢因之吳王濞都此劉昭曰邊築廣陵城周十四里半後江都國及廣陵國皆治焉後漢爲廣陵郡治三國魏移郡治淮陰而以故城爲邊邑後入於吳晉滅吳廣陵郡仍治淮陰宋書州郡志臨淮太守屬縣廣陵令前漢屬泗水後漢

屬廣陵三國時廢太康二年又立屬廣陵然則吳時始終不得居其城邑吳穰爲太守亦虛有其號耳

畱略爲東海太守

孫皓傳是南海太守且東海郡屬徐州吳時亦不得有其地此東海是南海之誤

太平元年

晉書天文志七月乙丑熒惑犯東井鉞星壬戌月又犯鉞星八月辛亥月犯箕吳廢孫亮又九月壬辰太白南斗占曰大臣有反者明年孫琳廢亮

注春吳歷曰正月爲權立廟稱太祖廟

何云吳歷爲鍾立廟孫堅父名鍾見宋書志然北宋諸本皆

作權字

召還據等聞緄代峻大怒

聞字上落一據字蓋不伏者惟一呂據故緄遣告欽咨二人取之而據獨受其敗也

辛亥獲呂據於新州

方輿紀要卷二十新州今之珠金沙也在江寧府北四十里一云在京口西大江中一清案呂據及孫緄傳皆有逆據江都之文則謂在京口西者近是也

以長沙東部爲湘東郡西部爲衡陽郡會稽東部爲臨海郡豫章東部爲臨川郡

宋書州郡志湘東太守領縣有新寧令陰山令皆吳立方輿

紀要卷八十新平城在衡州府常寧縣南吳析耒陽縣置屬  
湘東郡又宋書州郡志衡陽內史領縣有湘西新陽衡陽皆  
吳立臨海太守領縣有臨海始豐皆吳立臨川內史領縣有  
西平新建永城宜黃南豐東興安浦並吳立

注亮使黃門以銀椀并葢就中藏吏取交州所獻甘蔗餚  
何云此時已有甘蔗餚後人乃言唐時自蜀僧作之何其繆  
也

朱異自虎林率眾襲夏口

禹貢錙指云元和志漢陽縣漢水一名沔水西自汶川縣界  
流入漢口在縣東亦曰夏口左傳謂之夏納章懷注後漢書  
云漢水始欲出大江爲夏口又爲沔口實在江北孫權於江



南築城名爲夏口而夏口之名移於江南沔水入江之口止  
謂之沔口或謂之漢口夏口之名遂與漢口對立分據江之  
南北矣

韶州郡伐官材

何云官宋本作官

行至曲阿有老公于休叩頭曰

何云于宋本作干

率百僚以乘輿法駕迎於永昌亭

方輿紀要卷二十永昌亭在江寧府東

緄以兵千人迎於半野

寰宇記卷九十土山在昇州上元縣南三十里山無巖石有

林木臺觀娛遊之所卽半野也

注是時校事郎呂壹

郎字衍

注後密遣客十人於武陵龍陽汎洲上作宅

汎字水經注作汜是也方輿紀要卷八十常德府龍陽縣後漢爲漢壽縣地吳析置屬武陵郡汎洲在縣西五十里長二十里吳李衡種橘其上因名橘州亦謂之柑州

詔武士縛繯卽日伏誅

晉書五行志十二月丁卯夜有大風發木揚沙明日繯誅

夫所尚不消

何云消宋本作愴

秋用都尉嚴密議作浦里塘

通鑑胡注云據范書方技傳浦里塘在丹陽郡宛陵縣界

注至晉太康中吳故少府丹陽載永迎亮喪葬之賴鄉

賴鄉在尋陽界晉書武帝紀太康元年王渾克吳尋陽賴鄉是也

以會稽南郡爲建安郡分宜都置建平郡

南郡當作南部水經江水注巫縣故楚之巫郡也秦省郡立縣以隸南郡吳孫休分爲建平郡治巫城宋書州郡志建安太守領縣有吳興漢末立曰漢興吳更名邵武吳立曰昭武晉武帝更名又晉安太守太康三年分建安立領縣有晉安吳立曰東安晉武帝更名建武太守永安三年立領信陵興

山秭歸沙渠四縣信陵興山沙渠疑吳立也

注吳歷曰是歲得大鼎於建德縣

方輿紀要卷九十嚴州府建德縣後漢書郡國志吳郡富春縣地吳黃武四年析置

四年夏五月大雨水泉涌溢

宋書五行志昔歲作浦里塘功費無數而田不可成士卒死叛或自賊殺百姓愁怨陰氣盛也

九月布山言白龍見

前漢書地理志鬱林郡布山方輿紀要卷一百八布山廢縣在潯州府西五十里

是歲安吳民陳焦死埋之六日更生穿土中出

後漢書五行志曰至陰爲陽下人爲上厥妖人死復生宋書  
五行志于寶曰此與漢宣帝同事烏程侯皓承廢故之家得  
位之祥也宋書州郡志宣城太守領安吳令吳立方輿紀要  
卷二十八安吳城在盛國府涇縣西藍山南吳建衡中置縣  
屬宣城郡又旌德縣西北十五里有安吳廢縣蓋唐初所改  
置俗謂之沙城

五年春二月白虎門北樓災

晉書五行志白虎門城西門也

秋七月始新言黃龍見

方輿紀要卷九十始新城在嚴州府淳安縣西六十里威平  
鎮吳賀齊本置縣於此隋徙置雉山下雉山在縣治西南隔

江形如蹲雉隋以此名縣又有靈巖山在縣東北六里吳永安中有黃龍見名曰龍山唐元和中改今名與雉山對峙  
注太子名靈靈音如湖水灣澳之灣字酋酋音如迄今之迄

何云酋小名錄作藺宋本作苟

注次子名震震音如兕觥之觥字羿羿音如元磧首之磧

何云羿宋本作驛廣韻作羿在先韻言字內

注次子名柜柜音如草莽之莽

何云柜宋本作詎

注政以治民是以政成而民則易則生亂斯言之作豈虛也哉  
然欲令難犯何患無名

何云宋本治作正民則作民聽然作休

尤好射雉春夏之間常晨出夜還唯此時舍書

世說孫休好射雉至其時則晨去夕反羣臣莫不止諫此爲小物何足甚耽休曰雖爲小物耿介過人朕所以好之注引條列吳事曰休在位烝烝無有遺事唯射雉可譏

是歲使察戰到交阯調孔爵大豬注臣松之按察戰吳官號今楊都有察戰巷

察戰是鄧荀見晉書陶璜傳

五月交阯郡吏呂興等反

前漢書地理志交阯郡元鼎六年開屬交州宋書州郡志交阯太守領縣有吳興軍平武寧武安皆吳立

分武陵爲天門郡

水經澧水注永安六年武陵郡嵩梁山高峯孤竦素壁千尋望之若亭有似香爐其山洞開元朗如門高三百丈廣二百丈門角上各生一竹倒垂下拂謂之天簾孫休以爲嘉祥分武陵置天門郡宋書州郡志天門太守孫休分武陵立充縣有松梁山山有石石開處數十丈其高以弩仰射不至其上名天門因此名郡充縣後省領縣有漢中令二漢無晉太康地志有疑是吳立

注白燕見於慈湖

方輿紀要卷二十七慈湖水在南直太平府北六十五里江行記自建康沂江而上過白土磯入慈湖夾是也吳將笮融嘗屯兵於此慈湖疑卽慈湖也又紀要卷九十四浙江溫州



府永嘉縣南二十五里亦有慈湖然其名不著

夏四月魏將新附督王稚浮海入句章

後漢書郡國志會稽郡句章方輿紀要卷二十六新附城在無爲州南十五里吳諸葛恪築此以居新附者因名蓋其地後爲魏所有

秋七月海賊破海鹽殺司鹽校尉駱秀

前漢書地理志會稽郡海鹽方輿紀要卷九十一馬嘯城在縣治東漢吳王儋於此置司鹽校尉一清案吳亦有是官蓋仍漢之舊耳

復分交州置廣州

宋書州郡志廣州治番禺交州還治龍編

注休寢疾日不能言

日字何氏校改口

孫皓字元宗權孫和子也

鄭康成弟子亦有孫皓與吳歸命侯同姓名而詩七月正義  
遂云吳志孫皓問月令季夏火星中不知此出鄭小同所作  
鄭志而妄因孫皓字改云吳志耳康成不與歸命同時也春  
秋正義亦因康成答弟子孫皓問此事王深靈困學紀聞辨  
之

孫休立封皓爲烏程侯

寰宇記卷九十四引括地志云烏程東北有孫皓井一所口  
圓徑一丈六尺

西湖民景養相皓當大貴

寰宇記卷九十四西湖在湖州長興縣西五里一名吳城湖  
周迴七十里昔吳王闔閭築城輦土於此浸而爲湖闔閭弟  
夫概王因而創之湖中出佳蓴

十二月孫休葬定陵

朱氏彝尊曰吳志不言定陵所在順治中海鹽劭灣山居民  
穴地得隧道行數百步道窮有碑乃孫休陵也治銅爲門門  
有獸環兩狻猊夾門左右堅不可入未發而爲怨家所首亟  
以土掩之此地志所不載也

五官中郎將宏璆

宏璆通鑑作洪璆避廟諱也

注孫休時

何云孫休御覽作景皇

注父亮爲尚書令而陟爲中書令

隋書經籍志有吳中書令紀騭集卷三騭疑卽陟也

注宏璆曲阿人宏咨之孫權外甥也

宏咨見諸葛瑾傳孫權姊婿也璆若是權外甥當是咨之子  
夏四月蔣陵言甘露降

方輿紀要卷十九鍾山在應天府城東北朝陽門外諸葛武侯所云鍾山龍蟠者也一名蔣山吳大帝祖諱鍾因改曰蔣以漢末秣陵尉蔣子文逐賊有功因葬於此也因名晉咸和三年蘇峻反於歷陽自橫江濟從南道出蔣陵胡氏曰蔣山

之陵阜也

又送休四子於吳小城

方輿紀要卷二十四史記春申君城吳故墟以自爲都邑孔氏曰今蘇州也又於城內小城西北別築城以居云

以零陵南部爲始安郡桂陽南部爲始興郡

宋書州郡志始建內史孫皓分零陵南部都尉立爲始安郡屬廣州領縣有尙安永豐平樂建陵皆吳立廣興公相孫皓分桂陽南部都尉立爲始興郡領縣有始興令吳立中宿令漢舊縣屬南海吳度

寶鼎元年

宋書五行志寶鼎元年春夏旱又丹陽宣騫母年八十因浴

化爲龜兄弟閉戶衛之掘堂上作大坎實水其中龜入坎遊  
戲一二日恆延頸外望伺戶小開便輪轉自躍入於遠潭遂  
不復還與漢靈帝時黃氏母事同吳亡之象也

正月遣大鴻臚張儼五官中郎將丁忠弔晉文帝

晉書武帝紀泰始二年三月戊戌吳人來弔祭有司奏爲荅  
詔帝曰昔漢文光武懷撫尉佗公孫述皆未正君臣之儀所  
以羈縻未賓也皓遣使之始未知國慶但以書荅之隋經籍  
志張儼集一卷梁二卷又撰嘿記三卷一清案諸葛武侯建  
興六年十一月表蓋出此書

注弱冠知名歷顯位

何云歷上御覽有早字

注對曰皇皇者華蒙其榮耀無古人延譽之美

何云御覽蒙上有臣字耀作懼

注尚書何禎

魏志胡昭傳注引文士傳云何禎字元幹當从木作禎

注弋陽可襲而取

宋書州郡志弋陽太守本縣名屬汝南魏文帝分立

注吳錄曰永安今武康縣也

宋書州郡志吳興太守領縣有武康令吳分烏程餘杭立永安縣縣太康元年更名

丁固諸葛靚逆之於牛屯

方輿紀要卷二十牛屯在江寧府東南胡氏曰牛屯去建業

城二十一里一清案孫和傳云固覲前到九里蓋牛屯之別稱也

分會稽爲東陽郡分吳丹陽爲吳興郡

宋書州郡志東陽太守本會稽西部都尉吳孫皓立吳興太守孫皓分吳丹陽立領縣有武康令吳分烏程餘杭立永安縣晉武帝更名臨安令吳分餘杭爲臨水縣晉武帝更名注其亟分此九縣爲吳興郡

宋書州郡志吳分餘杭爲臨水晉武帝更名臨安原鄉漢中平二年分故鄣立

以零陵北部爲邵陵郡

宋書州郡志邵陵太守吳孫皓分零陵北部都尉立領縣有



高平昭陽皆吳立一清案昭陽見後漢書郡國志沈約云吳立非也又方輿紀要卷八十一新城縣吳置屬邵陵郡晉併入邵陽

十二月

宋書五行志寶鼎元年十二月太史奏久陰不雨將有陰謀皓深驚懼皓既肆虐羣下多懷異圖終至降亡

注大開園囿

何云園宋本作苑

分豫章廬陵長沙爲安成郡

寰宇記卷一百九吳分豫章之新喻宜春廬陵之平都永新長沙之安成萍鄉六縣爲安成郡宋書州郡志安城太守領

縣有新喻永新萍鄉俱吳立

三年

宋書天文志晉武帝太始四年正月丙戌彗星見軫青白色西北行又轉東行占曰爲兵喪軫又楚分也十月吳將施續寇江夏萬彧寇襄陽後將軍田璋荊州刺史胡烈等破卻之  
秋九月

宋書天文志太始四年七月星隕如雨皆西流占曰星隕爲民叛西流吳氏歸晉之象也六年吳夏口督孫秀率部曲二千餘人來歸

遣交州刺史劉俊前部督修則等入擊交阯爲晉將毛炅等所破皆死

晉書武帝紀吳將顧容寇鬱林太守毛炅大破之斬其交州刺史劉峻將軍修則顧和傳和曾祖容吳荊州刺史

建衡元年

刀劍錄孫皓以建衡元年鑄一劍文曰皇帝吳王小篆書

威南將軍薛翊蒼太守陶璜

後漢書郡國志蒼梧郡領十一城吳時析爲臨賀郡惟有廣信高要端谿猛陵鄆平五縣其臨賀謝沐憑乘富川屬臨賀以荔浦度始安而以合浦之臨允來屬宋志又云蒼梧太守領建陵監新吳立益增二縣也

二年春

寰宇記卷一百十二神人山在鄂州武昌縣西水路一百八

十一里歷代帝紀云吳建衡二年有神人騎白鹿從此山出  
晉書武帝紀太始六年春正月吳將丁奉入渦口揚州刺史  
牽宏擊走之

皓舉大眾出華里

方輿紀要卷二十華里在江寧府西南晉書武帝紀太始七  
年二月孫皓帥眾趨壽陽遣大司馬望屯淮北以距之三月  
孫秀部將何崇帥眾五千人來降

注又得國中降人言壽春下有童謠曰

國中何氏校改中國

汜瑣破交阯禽殺晉所置守將

晉書陶瑣傳瑣字世英丹陽秣陵人也父基吳交州刺史瑣

仕吳顯位孫皓時交阯太守孫諸貪暴爲百姓所患會察戰  
鄧荀至擅調孔雀三千頭遣送秣陵旣苦遠役咸思爲亂郡  
吏呂興殺請及荀以郡內附武帝拜興安南將軍交阯太守  
尋爲其功曹李統所殺帝更以建寧縣谷爲交阯太守谷又  
死更遣巴西馬融代之融病卒南中監軍霍弋又遣健爲楊  
稷代融與將軍毛貝九真太守董元牙門孟幹孟通李松王  
業龔能等自蜀出交阯破吳軍於古城斬大都督修則交州  
刺史劉俊吳遣虞汜爲監軍薛瑒爲威南將軍大都督瑒爲  
蒼梧太守距稷戰於分水瑒敗退保合浦亡其二將瑒怒謂  
瑒曰若自表討賊而喪二帥其責安在瑒曰下官不得行意  
諸軍不相順故致敗耳瑒怒欲引軍還瑒夜以數百兵襲董

元獲其寶物船載而歸瑒乃謝之以璜領交州爲前部督璜  
從海道出於不意徑至交趾元距之諸將將戰璜疑斷牆內  
有伏兵列長戟於其後兵纔接元僞退璜追之伏兵果出長  
戟逆之大破元等以前所得寶船上錦物數千匹遺扶嚴賊  
帥梁奇奇將萬餘人助璜元有勇將解系同在城內璜誘其  
弟象使爲書與系又使象乘璜輶車鼓吹導從而行元等曰  
象尚若此系必有去志乃就殺之璜瑒遂陷交趾吳因用璜  
爲交州刺史璜子威威弟淑子綏後並爲交州自基至綏四  
世爲交州者五人一清案遺察戰調孔雀乃孫休非皓也傳  
誤又晉書解系傳系字少連濟南著人此別是一人非董元  
所殺者又寰宇記卷一百七十一引交州記云陶璜築城於

土穴中得一物白色形如蠶蛹無頭長數丈大十圍輾輾動割腹肉如豬脂遂以爲臠香美瑣啖一杯於是三軍皆食焉九真日南皆還屬

寰宇記卷一百七十一驪州秦屬象郡漢屬九真郡吳置九德郡治九德縣宋州郡志九德太守故屬九真吳分立領縣有陽成九德越常皆吳立日南太守秦象郡漢帝更名吳省晉太康三年復置一清案傳中明有日南郡之名似吳未嘗廢省也蓋以屬國都尉領之不別置太守爾水經溫水注晉太康三年省日南郡屬國都尉以其所統盧容縣置日南郡及象林縣之故治宋書百官志郡守秦官漢末三國多以諸部都尉爲郡可知日南省置之義矣

注璜等以吳壯勇欲赦之而則子允固求殺吳

修則又有子曰湛晉新昌太守梁碩迎之以主交州事陶侃誘湛詣交州刺史王諒爲諒所殺見晉書忠義傳

注面縛吳詰之曰晉兵賊

兵字衍

注此與漢晉春秋所說不同

何云國志欲見蜀土之多耳當從習氏

分交阻爲新昌郡諸將破扶嚴置武平郡

晉書地理志新昌郡吳置統縣六麋沔嘉寧吳定封山臨西  
西道宋志無新昌有武平武平太守領縣惟吳定長云立方  
輿紀要卷一百十二太平城在交州府西北本漢封谿縣地



吳孫皓建衡三年討扶嚴夷以其地置武平郡治武寧縣唐  
先天元年改曰太平水經注引交州外城記曰交阯郡有扶  
嚴究在郡之北隔渡一海又曰竺芝扶南記山溪瀨中謂之  
究地理志曰郡有小水五十二并行大川皆究之謂也

注吳錄曰仁字恭武江夏人也本名宗避皓字易焉

世說注引孟嘉別傳曰宗葬武昌子孫家焉御覽卷四百十  
三引孟宗別傳曰宗事母至孝母亦能訓之以禮宗初爲雷  
池監奉魚於母母還其所寄遂絕不復食魚後宗典知糧穀  
乃表陳曰民昔爲雷池監母三年不食魚臣若典糧穀臣母  
不可以三年不食米臣敢以死守之又卷二百六十二引宗  
別傳曰宗爲豫章太守人思其惠路有行歌故時人生子以

孟爲名又卷二百二十九引別傳曰宗爲光祿勳大會宗先少飲酒後有彊之飲者一杯便吐傳詔司察宗吐麥察者以聞詔問麥飲意荅言臣家足有米麥飯愚臣所安是以食之上乃歎息曰至德清純如此

注除爲鹽池司馬

鹽一本作監是也孟宗時爲雷池監司馬方輿紀要卷二十六雷池在南直安慶府望江縣東三十里源出宿松縣界東流二百餘里經縣東南積而爲池又東十五里入江亦曰雷港亦曰雷江口亦曰大雷江

注宗母嗜筍冬節將至時筍尚未生宗入竹林哀歎而筍爲之出得以供母

寰宇記卷一百二十五孟宗宅在舒州望江縣北一里卽哭竹生筍之處方輿紀要卷九十一嘉興府東南有孟宗堰蓋宗爲吳令時所築也

遣樂鄉都督陸抗圍取闡

方輿紀要卷七十七樂鄉城在荊門州北八十里漢郡縣地又卷七十八樂鄉城在松滋縣東七十里三國吳所築朱然嘗鎮此其後陸抗又改築焉屯兵於此水經注江水經樂鄉城北又東經公安縣北胡三省曰樂鄉城北江中有沙磧對岸蹈淺可渡江津要害之地也

闡及同討數十人

討乃計字之譌宋書五行志太始六年冬大雪七年十二月

大雪明年有步闚楊肇之敗死傷甚眾

注江表傳曰初皓游華里或與丁奉畱平密謀曰此行不急若至華里不歸社稷事重不得不自還

陸凱傳注引吳錄言平與奉有隙故所謀不行江表傳之言未得爲實

注吳歷曰中書郎奚熙譖宛陵令賀惠惠劭弟也遣使者徐粲訊治熙文譖粲顧護不卽決斷皓遣使就宛陵斬粲收惠付獄會赦得免

此注當在三年殺奚熙下錯簡於此方輿紀要卷二十八盛國府宣城縣卽漢宛陵縣初屬鄣郡後爲丹陽郡治

司徒丁固卒

世說注引會稽後賢記丁潭字世康山陰人吳司徒固曾孫  
沈婉有雅望少與孔愉齊名仕至光祿大夫晉陽秋曰孔敬  
康丁世康張偉康俱著名時謂會稽三康寰宇記卷九十四  
丁固墓在湖州武康縣東十五里

秋九月

晉書武帝紀太始九年七月吳將魯淑圍弋陽征虜將軍王  
渾擊敗之王渾傳曰渾假節領豫州刺史吳將薛瑩魯淑眾  
號十萬淑向弋陽瑩向新息時州兵並放休息眾裁一旅浮  
淮潛濟出其不意擊破之

投其身於四望之下

寰宇記卷九十四望山在昇州上元縣西北十五里高十七

丈可望四方以爲名

送付建安作船

宋書州郡志晉安太守晉武帝分建安立領縣有原豐令太  
康三年省建安典船校尉立溫麻令太康四年以溫麻船屯  
立又永嘉太守領縣有橫陽令太康四年以橫輿船屯爲始  
陽後更名此又一作船處也方輿紀要卷九十四作橫輿與  
嶼字同

秋七月

晉書武帝紀太始十年秋七月壬午吳平虜將軍孟泰偏將  
軍王嗣等帥眾降九月癸亥以大將軍陳騫爲太尉攻拔吳  
和里城獲吳立信校尉莊祐吳將孫遵李承帥眾寇江夏太

守稽喜擊破之十二月吳威北將軍嚴聰揚威將軍嚴整偏將軍朱買來降一清案朱買下史落臣字宋天文志大始十年十二月有星孛於軫軫楚分也咸寧二年六月星孛於氏氏兗州分七月星孛大角八月星孛太微至翼北斗三台翼又楚分三年星孛於胃胃徐州分四月星孛女御五月又孛東方七月星孛紫宮五年三月星孛於柳柳三河分也明年吳亡李主兵喪征吳之役三河徐兗之兵悉出交戰於吳楚之地吳丞相都督以下梟戮十數偏裨行陳之徒馘斬萬計皆其徵也

分鬱林爲桂林郡

宋書州郡志鬱林太守秦桂林郡屬尉佗元鼎六年復更名

領縣有領方令漢舊縣吳改曰臨浦晉武復舊又陰平新邑  
建始長平皆吳立懷安何志吳改未知先何名桂林太守本  
縣名屬鬱林孫皓分鬱林治武熙武熙令本曰武安應是吳  
立太康元年更名方輿紀要卷一百九引廣記漢改秦之桂  
林郡爲鬱林孫皓又分立桂林郡時謂桂林縣爲小桂桂林  
廢縣在豫州東南

天冊元年

晉書武帝紀咸寧元年六月吳又寇江夏宋書五行志天冊  
中龍乳於長沙民家啖雞雛京房易妖曰龍乳人家王者爲  
庶人其後降皓

天璽元年吳郡言臨平湖自漢末草穢壅塞今更開通長老相



傳此湖塞天下亂此湖開天下平

晉書藝術傳陳訓字道元歷陽人少好秘學孫皓以爲奉禁  
都尉使其占候皓政嚴酷訓知其必敗而不敢言時錢塘湖  
開或言天下當太平青蓋入洛陽皓以問訓訓曰臣止能望  
氣不能達湖之開塞退而告其友曰青蓋入洛將有輿櫬街  
壁之事非吉祥也尋而吳亡訓隨例內徙爲諫議大夫一清  
案後漢書輿服志曰皇太子皇子皆車安朱班輪青蓋金華  
蚤黑櫪文畫轡文輅金塗五末皇子爲王錫以乘之故曰王  
青蓋車吳既建號爲帝而有青蓋入洛之謠非降黜而何

會稽太守車浚

劉氏小說曰陸遜聞車浚令名請與相見謂曰早欽風彩何

乃龍蟠鳳峙不肖降顧耶荅曰誠知公侯敦公旦之博納同  
尼父之善誘然蜥蜴不能假重雲以升舉鸚鵡不能從激風  
以飛揚是以無因爾時坐上賓客多是吳人皆相顧謂曰武  
陵蠻夷郡乃有此彥人也後曰吳太伯端委之化以改被髮  
文身之俗今乃上挺聖主下生賢佐亦何常之有遜歎曰國  
其昌也乃有斯人

鄱陽言廬陽山石文理成字凡二十二云楚九州渚吳九州都楊  
州士作天子四世治太平始

方輿紀要卷八十五鄱陽山在饒州府西北百十五里鄱陽  
湖中初名力士山又名石印山三國志孫皓天璽元年鄱陽  
歷陵有山石文理成字卽鄱陽山也歷陵今九江府德安縣

孫吳時山蓋當二縣之間一清案陽字以寰宇記校當作陵  
歷陽今和州也不屬鄱陽土卽土字古通

注皓大喜曰吳當爲九州作都渚乎

何云宋本無爲字

又吳興陽羨山有空石長十餘丈名曰石室在所表爲大瑞乃  
遣兼司徒董朝兼太常周處至陽羨縣封禪國山

此卽孫休傳之離里山也寰宇記卷九十二國山在常州宜  
興縣西南五十里輿地志云本名離里山山有九峰相連亦  
名九斗山亦名升山吳五鳳二年其山墜大石自立高九尺  
三寸大十三圍三寸歸命侯又封禪爲中岳改名國山改元  
以叶石文石今見存陳暄國山記云土人皆傳碣下埋金銀

函玉璧銀龍銅馬之屬孫皓疑有王氣故以此物鎮之又宋書符瑞志天璽元年臨海郡吏伍曜在海水際得石樹高三尺餘枝莖紫色結屈傾靡有光采山海經所載玉碧樹之類也

夏口督孫慎出江夏汝南燒略居民

晉書武帝紀咸寧三年五月戊子吳將邵凱夏祥帥眾七千餘人來降

注俶奢淫無厭取小妻二十餘人

何云三宋本作二

二年秋七月

宋書天文志咸寧四年四月蚩尤旗見星傳蚩尤旗類彗而

後曲象旗漢武帝時見長竟天獻帝時又見長十餘丈皆長星也魏高貴時則爲白氣案校眾記是歲無長星宜又是異氣後二年傾三方伐吳是其應也一清案晉志云見東井又宋志咸寧四年九月太白當見不見占曰是謂失舍不有破軍必有死王之墓又有亡國是時羊祜表求伐吳上許之五年十一月兵出太白始夕見西方太康元年三月大破吳軍孫皓面縛請死吳國遂亡又晉書武帝紀咸寧四年冬十月揚州刺史應綽伐吳皖城斬首五千級焚穀米百八十萬斛十一月吳昭武將軍劉翻厲武將軍祖始來降

三年夏

晉書天文志咸寧五年三月星孛於柳四月又孛於女御七

月孛於紫宮占曰外臣陵主柳又三河分野大角大微紫宮  
女御並爲王者明年吳亡是其應也孛主兵喪征吳之役三  
河竟徐之兵悉出交戰於吳楚之地吳丞相都督以下梟戮  
十數偏裨行陳之徒馘斬萬計皆其徵也

注漢晉春秋曰下是吳有說識者曰吳之敗兵起南裔世吳者  
孫也

下當作先世當作亡

執金吾滕循爲司空未拜轉鎮南將軍假節領廣州牧

循當作脩晉書列傳滕脩字顯先南陽西鄂人仕吳爲將帥  
封西鄂侯孫皓時代熊睦爲廣州刺史甚有威惠徵爲執金  
吾廣州部曲督郭馬等爲亂皓以脩宿有威惠爲嶺表所伏

以爲使持節都督廣州軍事鎮南將軍廣州牧以討之未尅而王師伐吳脩率眾赴難至巴丘而皓已降乃縞素流涕而還與廣州刺史閻豐蒼梧太守王毅各送印綬詔以脩爲安南將軍廣州牧持節都督如故封武當侯加鼓吹委以南方事在南積年爲邊夷所附太康九年卒謚曰聲子並上表詡賜謚曰忠

馬殺南海太守劉略

劉略卽畱贊子見前孫亮傳

徐陵督陶濬將七千人

方輿紀要卷二十五徐陵亭在鎮江府西南徐記京口先爲徐陵鎮其地蓋丹徒縣西鄉京口里也通釋徐陵丹徒京口

其實一也吳以其臨江津因置督守之

遂以耆爲侍芝郎平爲平慮郎皆銀印青綬

宋書五行志于寶曰明年晉平吳王濬止船正得平渚姓名  
顯然指事之微也

冬晉命鎮東大將軍司馬他向涂中安東將軍王軍  
軍乃渾之譌

太尉賈充爲大都督

晉書武帝紀行冠軍將軍楊濟爲副總統眾軍  
量宜處要盡軍勢之中

晉書瑯琊武王他傳他字子將鎮下邳平吳之役率眾數萬  
出涂中孫皓奉箋送璽綬詣他降周浚傳浚字開林汝南安



成人仕魏爲楊州刺史封射陽侯隨王渾伐吳攻破江西屯  
成與孫皓中軍大戰斬僞丞相張悌等首級數千俘馘萬計  
進軍屯於橫江孫皓降以功進封成武侯王濬傳濬字士治  
宏農湖人拜益州刺史武帝謀伐吳詔濬修舟艦濬乃作大  
船連舫方百二十步受二千餘人以木爲城起樓櫓開四出  
門其上皆能馳馬來往又畫鵠首怪獸於船首以懼江神舟  
棹之盛自古未有尋以謠言拜濬爲龍驤將軍監梁益諸軍  
事吳人於江險磧要害之處並以鐵鎖橫截之又作鐵錐長  
丈餘暗置江中以逆距船先是羊祜獲吳間牒具知情狀濬  
乃作大筏數十亦方百餘步縛草爲人被甲持杖令善水者  
以筏先行筏遇鐵錐錐輒著筏去又作火炬長十餘丈大數

十圓灌以麻油在船前遇鎖然炬燒之須臾融液斷絕於是船無所礙濬自發蜀兵不血刃攻無堅城夏口武昌無相支抗於是順流鼓棹徑造三山皓追游擊將軍張象率舟軍萬人禦濬象軍望旗而降皓聞濬軍旌旗器甲屬天滿江威勢甚盛莫不破膽濬入石頭皓乃備亡國之禮造於壘門濬躬解其縛受璧焚櫬送於京師拜濬輔國大將軍領步兵校尉舊校唯五置此營自濬始也封爲襄陽縣侯封子彝陽鄉亭侯遷鎮軍大將軍加散騎常侍領後軍將軍又轉撫軍大將軍開府儀同三司加特進卒時年八十諡曰武葬柏谷山唐彬傳彬字儒宗魯國鄒人也初爲郡門下掾轉主簿刺史王沈集諸參佐盛論距吳之策以問九郡吏彬與譙郡主簿張

惲俱陳吳有可兼之勢沈善其對又使彬難言吳未可伐者而辭理皆屈後與王濬共伐吳彬屯據衝要爲眾軍前驅每設疑兵應機制勝陷西陵樂鄉多所擒獲自巴陵沔口以東諸賊所聚莫不震懼倒戈肉袒彬知賊寇已殄孫皓將降未至建鄴二百里稱疾遲留以示不競果有先到者爭物後到者爭功於時有識莫不高彬此舉封上庸縣侯卒諡曰襄賈充傳充總統六師南屯襄陽吳江陵諸守皆降乃徙屯項軍中忽失充所在充帳下都督周勤時晝寢夢見百餘人錄充引入一逕勤驚覺聞失充乃出尋索忽覩所夢之道遂往求之果見充行至一府舍侍衛甚盛府公南面坐聲色甚厲謂充曰將亂吾家事必爾與荀勗旣惑吾子又亂吾孫閒使任

愷黜汝而不去又使庾純詈汝而不改今吳寇當平汝方表  
斬張華汝之闇慙皆此類也若不悛愼當旦夕加罪充因叩  
頭流血公曰汝所以延日月而名器如此者是衛府之勳耳  
終當使繼嗣死於鐘簾之間太后斃於金酒之中小子困於  
枯木之下苟勛亦宜同然其先德小濃故在汝後數世之外  
國嗣亦替言畢命去充忽然得還營顏色憔悴性理昏喪經  
日乃復及緇死鐘下賈后服金酒而死賈午考竟用大杖終  
皆如所言

或剝人之面或鑿人之眼

晉書王濟傳帝嘗與濟弈棊而孫皓在側謂皓曰何以好剝  
人面皮皓曰見無禮於君者則剝之濟時伸腳局下而皓譏

焉

四年春

宋書五行志太康元年正月己丑朔五色氣冠日自卯至酉  
占曰君道失明丑主斗牛斗牛爲吳地是時孫皓淫暴四月  
降

預又斬江陵督伍延渾復斬丞相張悌丹陽太守沈瑩等所在  
戰克

晉書武帝紀太康元年正月癸丑王渾克吳尋楊賴鄉諸城  
獲吳威武將軍周興二月戊午王濬唐彬等尅丹陽城庚申  
又尅西陵殺西陵都督鎮軍將軍畱憲征南將軍成璩西陵  
監鄭廣王戍濬又尅夷道樂鄉城殺夷道監陸晏水軍都督

陸景甲戌杜預尅江陵斬吳江陵督伍延平南將軍胡奮尅江安於是諸軍並進樂鄉荆門諸戍相次來降

注圍成陽都尉張喬於楊荷橋

方輿紀要卷二十九楊荷橋在和州東南二十里

注吳副軍師諸葛靚欲屠之

晉書諸葛恢傳恢字道明祖誕魏司空爲文帝所誅父靚奔吳爲大司馬吳平逃竄不出武帝與靚有舊靚姊又爲瑯琊王妃帝知靚在姊間因就見焉靚逃於廁帝又逼見之謂曰不謂今日復得相見靚流涕曰不能漆身皮面復覩聖顏詔以爲侍中固辭不拜歸於鄉里終身不向朝廷而坐時潁川荀闡字道明陳畱蔡謨字道明與恢俱有名譽號曰中興三

明人爲之語曰京都三明各有名蔡氏儒雅荀葛清

注與討吳護軍張翰

何云此又一張翰非季鷹也

注大敗吳軍於版橋

方輿紀要卷二十版橋浦在江寧府西南三十里晉書杜預傳預攻江陵也吳人知預癭憚其智計以瓠繫狗頸示之每大樹似癭輒斫使白題曰杜預頸及城平盡捕殺之

注諸葛靚與五六百人退走使過迎悌悌不肯去靚自往牽之謂曰且夫天下存亡有大數豈卿一人所知如何故自取死爲何云且夫二字依陳少章當作巨先

注皓殿中親近數百人叩頭謂皓曰

謂當作請

而王濬順流將至

方輿紀要卷十九梁山有二東梁山一名搏望山在太平府西南三十里西梁山在和州南七十里夾江對峙如門之闢亦曰天門山一名蛾眉山爲大江之關要晉人伐吳王濬自武昌順流東下吳主遣將軍張象帥舟師萬人禦之於梁山象望津而降濬遂直指建業

壬申王濬最先到

宋書五行志天紀中童謠曰阿童復阿童銜刀游渡江不畏岸上虎但畏水中龍晉武帝聞之加王濬龍驤將軍及征吳江西眾無過者而王濬先定秣陵晉書羊祜傳祜聞童謠曰



此必水軍有功但當思應其名者耳濬小字阿童因表畱濬  
監益州諸軍事

注晉陽秋曰濬收其圖籍領州四郡四十二

晉書武帝紀作四十三案晉書地理志吳荊州統南郡武昌  
武陵宜都建平天門長沙零陵桂陽衡陽湘東邵陵臨賀始  
興始安十五郡楊州統丹陽吳會稽吳興新都東陽臨海建  
安豫章鄱陽臨川安成廬陵南部十四郡交州吳黃武五年  
割南海蒼梧鬱林三郡立廣州交阯日南九真合浦四郡爲  
交州赤烏五年復置珠崖郡永安七年復以前三郡立廣州  
及孫皓又立新昌武平九德三郡廣州黃武五年分交州之  
南海蒼梧鬱林高梁四郡立爲廣州俄復舊永安六年復分

交州置廣州分合浦立合浦北部以都尉領之孫皓分鬱林立桂林郡

注縣三百一十三戶五十二萬三千

劉昭補志注云正始五年楊威將軍朱照日所上吳之所領兵戶九十三萬二千推其民數不能多蜀矣蓋蜀亡領戶九十四萬三千四百二十三口五百三十七萬二千八百九十一人也魏正始五年吳赤烏七年

皓太子瑾拜中郎諸子爲王者拜郎中

晉書武帝紀吳之舊望隨才擢敘孫氏大將戰亡之家徙於壽陽將吏渡江復十年百姓及百工復二十年何云拜上御覽引有皆字

注王濬治船於蜀吾彥

晉書吾彥傳彥字士則吳郡吳人也出自寒微有文武才幹身長八尺手格猛獸膂力絕羣仕吳爲通江吏時將軍薛珣仗節南征軍容甚盛彥觀之慨然而歎有善相者劉禮謂之曰以君之相後當至此不足慕也初爲小將給吳大司馬陸抗抗奇其勇略將拔用之患眾情不允乃會諸將密使人陽往拔刀跳躍而來坐上諸將皆懼而走唯彥不動舉几禦之眾服其勇乃擢用焉稍遷建平太守時王濬將伐吳造船於蜀彥覺之請增兵爲備皓不從彥乃輒爲鐵鎖橫斷江路及師臨境緣江諸城皆望風降附或見攻而拔唯彥堅守大眾攻之不能剋乃退舍禮之吳亡彥始歸降

注遇同人之頤

何云安溪云乾爲天君離者南面皆尊象也艮山嶽公族之  
兆震於易亦占建侯此明君降爲臣位矣同人者主天下大  
同也頤者養也亦爲晉并吞而得寄食偷生之意筮之示皓  
亦顯矣

五年皓死於洛陽

姜云皓已降矣誰爲五年乎當書晉年號爲得

注葬河南縣界

寰宇記卷三芒山在河南縣北十里吳後主蜀後主皆有冢  
在此山鼎錄孫皓鑄一鼎於蔣山紀吳之祿數八分書韋續  
書九品曰下中孫皓行隸

注矧諧虐乎

諧當作僭

注遂掃清宗枋

晉書陸機傳及文選枋作枋

注旋皇輿於夷庚

文選注引繁欽辨惑曰吳人以船楫爲輿馬以巨海爲夷庚夷庚者藏車之所困學記聞云左傳成十八年披其地以塞夷庚正義謂平道也二字出於此

注而吳覓然坐乘其弊

晉書文選覓作覓

注丁奉鍾離斐以武毅稱

何云文選無鍾字注云魏將諸葛誕據壽春降魏人圍之使  
丁奉與離斐解圍奉爲先登斐力戰有功拜左將軍黎與離  
音相近是一人但字不同余謂李善所見之本必可徵信但  
此斐字恐牧字之譌鍾離牧爲武陵太守以少掾討五谿事  
在蜀并於魏之後作牧爲得也

注劉公因險飾智

險下脫以字

注北據東坑

東坑顧承陳武傳俱作章阮李善曰東阮在西陵步闢城東  
北長十餘里陸抗所築之城在東坑上而當闢城之北其迹  
並存

番禺許之璇初校

番禺陶邵學覆校

陽湖吳翊寅再覆校

三國志注補卷四十九

仁和趙一清撰

吳志列傳第四

注續漢書曰繇祖父本

後漢書劉寵傳本作丕

注山陰縣氏去治數十里有若邪中在山谷間

氏當作民中字疑衍劉寵傳云山陰縣有五六老叟龐眉皓  
髮白若邪山谷間出

繇兄岱字公山歷位侍中兗州刺史

劉寵傳初平三年青州黃巾賊入兗州殺任城相鄭遂轉入  
東平岱擊之戰死



繇奔丹徒

方輿紀要卷二十五丹陽縣治西南有故城址曰劉繇城相傳繇所築也

注劉繇將奔會稽許子將曰

後漢書許劭傳劭字子將汝南平輿人少峻名節好人倫多所賞識若沛國樊子昭和陽士者並顯名於世避地到廣陵徐州刺史陶謙禮之甚厚劭不自安復投揚州刺史劉繇於曲阿及孫策平吳劭與繇南奔豫章而卒時年四十六寰宇記卷一百六許子將墓在洪州南三里南昌縣南六里雷次宗豫章記云劭就劉繇於曲阿繇敗隨繇奔豫章中路疾卒因焚屍柩吳天紀中太守吳興沈法秀招魂葬劭於此

遂沂江南保豫章駐彭澤

寰宇記卷一百六劉繇城在南昌縣東北三十八里孫策略地於曲阿攻劉繇敗奔豫章築城自保今人號爲劉繇城

注竿融出軍不顧命名義者也

何云從冊府元龜校衍命字

繇尋病卒時年四十二

水經沔水注毗陵縣舊會稽之屬縣也丹徒縣北二百步有故城本毗陵郡治舊去江三里岸稍毀遂至城下城北有劉繇墓淪於江江卽北江也

乃大起浮圖祠

晉書佛圖澄傳石季龍著作郎王度曰佛外國之神非諸華

所應祠奉漢代初傳其道惟聽西域人得立寺都邑以奉其  
神漢人皆不出家魏承漢制亦循前軌

廣陵太守趙昱

後漢書陶謙傳昱字元達瑯琊人清己疾惡潛志好學雖親  
友希得見之爲人耳不聽邪目不妄視太僕种拂舉爲方正  
融利廣陵之眾因阻誅殺昱

阻誅一本作酒酣與陶謙傳同

後策路住江夏

路住一本作西伐

太史慈字子義東萊黃人也

方輿紀要卷三十六故黃縣在登州府黃縣東十五里一名

東黃城卽古萊子國都也後漢爲東萊郡治

更遣吏有章

有字何氏校改通

時融以黃巾寇暴出屯都昌

方輿紀要卷三十六都昌城在萊州府昌邑縣西漢縣屬北海郡今城南五里有大營城北五里有小營城俗爲大營小營二村相傳卽孔融與黃巾相拒處

慈當與繇俱奔豫章而遁於蕪湖

方輿紀要卷二十七蕪湖城在蕪湖縣東三十里右鳩茲也黃武初徙縣於今治

注吳歷云慈於神亭戰敗爲策所得與本傳大異疑爲謬誤

方輿紀要卷二十五神亭在延陵舊縣西三十里今鎮江府丹陽縣南三十里有延陵城卮林曰慈若於神亭見囚則策方解縛而遽云盜識神亭時何其倉卒不次又當言今日得我云何不宜言爾時也案呂範傳範從孫策攻太史慈於勇里乃知神亭時慈獲策兜鍪而勇里時策致慈縲絏也

注但所託未得其人

何云宋本人下有耳字

注但其後不達臣節

何云宋本達作遵

注仍有兼拜之志矣

何氏從冊府元龜仍改乃

劉表從子磐驍勇數爲寇於艾西安諸縣策於是分海昏建昌左右六縣以慈爲建昌都尉治海昏并督諸將拒磐磐絕迹不復爲寇

方輿紀要卷八十四艾城在南昌府寧州西百里地名岡龍坪左傳吳公子慶忌出居於艾卽此西安今武寧縣建安中分建昌縣置又太史城在奉新縣西二十里城周圍三里西南有城角山東南有盤山北枕江水其地險固基址尚存寰宇記卷一百六幕浮山一名募阜山在洪州分寧縣西一百九十里高一千餘丈周圍一百二十里太史慈拒劉磐於此山置營幕乃以名焉又方輿紀要建昌縣東四里有鎮邊營漢建安八年太史慈築以拒劉磐

三國志注本卷四十九  
慈以弓射之

以字一本作引

子享

享字何氏校改享注同

士燮字威彥蒼梧廣信人也

方輿紀要卷一百八梧州府蒼梧縣漢置廣信縣今府治東  
有廣信故城

燮乃表壹領合浦太守次弟徐聞令黼

方輿紀要卷一百四徐聞縣在雷州府南一百五十里漢縣  
爲合浦郡治後漢屬合浦吳爲珠崖郡治

黼弟武領海南太守

海南當作南海前漢書地理志南海郡秦置秦敗尉佗王此地武帝元鼎六年開屬交州

耽玩春秋爲之注解

隋書經籍志有土燮注春秋注十二卷又梁有土燮集五卷注奉字君異侯官人也

寰宇記卷一百二十八杏山在濠州南六十里神仙傳董奉吳時居此山爲人治病唯令種杏五株數年杏至萬株後服杏金丹得仙

漢遣張津爲交州刺史

晉書地理志交州建安八年張津爲刺史土燮爲交阯太守共表立爲州乃拜津爲交州牧宋書州郡志交阯刺史治龍



編建安八年改曰交州治廣信

今以變爲綏南中郎將董督七郡領交阯太守如故

後漢書郡國志補注引王範交廣春秋曰交州治羸陵縣元封五年移治蒼梧廣信縣建安十五年治番禺縣詔書以州邊遠使持節并七郡皆受鼓吹以重威鎮一清案此漢朝所命詔士燮不詔步騭也宋書州郡志十六年徙治番禺與交廣春秋差越一年又宋志交阯太守領縣有吳興軍平武寧武安並吳立

壹黼匡後出權原其罪及燮質子厥皆免爲庶人數歲壹黼坐法誅厥病卒無子

隋書經籍志有交州雜事九卷記士燮陶璜事

番禺許之璇初校

番禺陶邵學覆校

南海桂銘球再覆校

三國志注補卷四十九

三國志注補卷四十九

六

廣雅書局藏